

que nobiles viri plures interfecti sunt. *Manegoldus* etiam *Comes* cum non paucis cecidit. Prælium hoc die XV. Calendas Septembris factum esse Wippo tradit. XVI. Calendas Septembris Hermannus Contractus hic nominat, qui et Manegoldum Augiæ sepultum esse affirmat. Hic est *Manegoldus*, quem Notitia Richardi *Ducem* perperam appellat. Cum vero is nunc Ernesti motibus invigilaret, non video, quomodo Romæ in conventu illo fictitio præfens esse potuerit. Hermannum Ducem Alemanniæ anno 1038. obiisse Hermannus Contractus et Annalista Saxo tradunt, hocque confirmatur ex Necrologio Fuldensi, in quo legitur: *MXXXVIII. Herimannus Dux ob. Non. April.* Post ejus mortem Ducatus Alemanniæ ab Henrico III. Rege retentus, et demum anno 1045. *Ottoni Comiti Palatino*, filio Ezonis et Mathildis, collatus est, ut Hermannus Contractus indicat. Otto hic vita excessit anno 1047. ut iterum ex eodem Contracto et Annalista Saxone scimus, et *in ejus locum Otto Marchio de Svinvorde, Marchionis [Austriæ] Heinrici ex Gerberga Marchionissa filius, surrexit*, ut Annalista Saxo loquitur. Hoc etiam teste, anno 1057. *Otto de Svinvorde Dux Suevorum IV. Kal. Octobris obiit, et in Svinvorde cum parentibus suis sepultus est. Ducatum ejus Rodolfus de Rinwelden, cui desponsata fuit soror Regis, obtinuit.* Hic est *Ruodolfus Dux*, quem testem Notitiæ Richardi Abbatis anno 1030. fuisse fingitur. Putidum igitur illa Notitia hominis otiosi et impostoris commentum est, ut quivis agnoscat, qui vel primis labris historiarum studia degustavit.

XXXVI. Pagina 90. refert, Clementem PP. II. *Monasterium S. Andreae Romanum* Roingo Abbati ejusque Monasterio donasse. Sed Bullam jam solide satis supra cap. XXXI. excussimus, nec aliquid Schannato restat, quam ut Clivo Scauri et Suburra demigret. *Clivi Scauri Monasterium S. Andreae* Fuldenses nunquam habuerunt. *Monasterium S. Andreae ad montem Exquilinum* an unquam extiterit, hactenus ignoratur; hodie *Aediculam* ibi *S. Andreae in Portugallo* esse scimus. Nec hanc Fuldenses possedisse author noster vel unico monumento genuino ostendit; nos vero Scrutarios ibi Patronum suum S. Berardinum venerari et merces suas levidenses venum exponere demonstravimus.

Monasterium S. Andreae Romæ Fuldenses habuisse nondum ostensum est.

XXXVII. De *Cænobio S. Dionysii in Bantz* fatetur Cl. Schannatus, illud in Dioecesi Wirceburgensi jacere; sed videtur tacite negare, idem de Dioecesi Wirceburgensi esse. Provocat ad Traditionem Fuldensem DCXII. qua Alberata Comitissa *tradidit Deo et S. Bonifacio Martyri quoddam Monasterium in Banze constructum pro remedio anime sue et defuncti mariti sui ac filiorum, et hoc tantum ab Egberto Abbate Fuldensi expetiit, ut in eodem Monasterio secundum Regulam S. Benedicti Monachos institueret, ceteraque Regule congruentia adaptaret.* Traditionem hanc suscepisse dicitur *Gerhardus Advocatus Fuldensis Monasterii.* Cl. Schannatus hoc Monasterium diu post ejusdem instaurationem ab Ottone I. Sancto Bambergensi Episcopo circa annum 1120. factam, *adhuc juris fuisse Fuldici, arguit ex silentio Eberhardi Monachi, qui sub annum 1160. illas donationis tabulas una cum reliquis in Chartarium suum Fuldense referens, nullius interjectæ mutationis meminere.* Banzense Monasterium a S. Ottone Episcopo Bambergensi instauratum esse, ex literis consolatoriis, Abbatibus Monasteriorum per ipsum fundatorum missis, manifestum est, quæ in Andreae Vita S. Ottonis lib. V. cap. 59. extant. *Banzense vero Monasterium*

Monasterium Banzense fuit et est Dioecesis Wirceburgensis.